

vnder homesse, wenne die prediget schire vffen ist, vnde die andere vf den dornstag, die andern zewu messen den dinstagk vnde fritagk vf der brucke früe in der cappelle halden sal. Der selbige altariste addir capplan vnde alle seyne nachkomelinge sollen ouch an dem sontage vnde andern grossen festen mit dem crucze mit vnserim pfarrer vnde prediger in der processien vmghen cum religione vnde vns ouch zcu eyner ewigen widdirstatunge alle iar ierlichen eyn halb schog guter groschen vf sente Michils tagk vnuorczoglichen in vnser closter reichen vnde geben, vnde sich halden yn allerley masse als in andern steten gewonheit ist vnde nach dem pferrer richten. Wurde ouch sache, das etzliche messen vnde votiva durch innige frome leute in der capelle vf der brucke bestalt wurden zcu syngen adir zcu leßen, die sal der oftgnante altarista adir capplan nicht vfnemen, sundern an denn pfarrere adir prediger brengen, die solche messe vort mit vns dem probiste von sente Affran bestellen mogen, wy en das beqwemlich wirt seyn. Was ouch oppfers vf dem altare in der capelle vf der brucken an der kirchwihunge adir sust vbir das gantze iar an gelde, silber, an wachsse adir an lebendem oppfer gefellit, das sal vnsers clostirs seyn vnde vns zcustehen, was abir oppfers gefellit in die taffeln vf dem altare an gelde, an silbir, in dy stocke wachs czeichen vnde alle testamenta, die zcu der capelle bescheiden werden, die habe wir der capelle zcu gute lassen zcustehen zcu enthaldunge der brucke ane allen intrag vnde ane geuerde. — Gegeben 2c. in dem funffe vnde sebinczigsten iare am montage nach Quasimodogeniti.

Nach dem Orig. im Rathsarchiv zu Meissen mit dem Siegel des Convents, das des Probsts ist verloren gegangen.

### No. 131. 1475. 8. Apr.

*Kurfürst Ernst und Herzog Albrecht verlegen den bisher am Sonnabend nach Lätare in Lommatzsch gehaltenen Jahrmart aus näher angegebenen Gründen nach Meissen.*

Wir vonn gotis gnaden Ernnst des heiligenn Romischen reichs ertzmarschalk kurfürst vnnd Albrecht gebruder hertzogenn zu Sachssenn — bekennen 2c. Nachdem als in vnserm marckte Lommatzsch etzlich lange zeit ein iarmarckt vff sonnabent nach Laetare in der heiligenn fastenn gehalden, zu dem vil frombd vßlendisch volck zukeuffen vnnd zuuerkeuffen komen, auch vast gut vnnd kauffmanschatz bracht ist, habin wir offtmals bedacht vnnd gewegen, nachdem der egnant marckt Lommatzsch vnbeewart vnnd vnbeslossenn, deßhalben sich alle zeit des iarmarckts manchirley duberey vffrur vnnd zweitracht aldo begeben, dem man nicht had notturfftiglich mogen vorgedencken noch gestueren, auch vor fewers nott nicht wol versorget vnnd der kauffman hantwerger vnnd ander, die sich dohin zuuerkeuffen vnnd keuffen fugen, nach notturfft als sichs zu solchem weßen irheischet mit herbrigen vnnd andern nicht vorsorget sind, vnnd das vnßer stad Missen zu solchim handel als wol vnnd bequeme als Lommatzsch gelegenn vnnd allermenniglicher vor sollicher far vnnd mit allerley notturfft baß wenn zu Lommatzsch vorsorget ist: Hirumbe haben wir sollichen iarmarckt, der bißher uff die obgerurte zeit zu Lommatzsch gehalden ist, auß rechtem wissen zeitiger vorbetrachtunge nach vorgehabtem rate vnser rete wolbedechtiglich uß vnßer fürstlichen wirde vnnd macht in vnser obgnante stadt Missen geleet, also das sollicher marckt hinfur uff die obgerurte zeit alle iar zu Missenn vnnd nicht zu Lommatzsch gehalten sal werdenn, dortzu allirley koufflute vnnd hantwerger auch allirley ander lewt vßlendische vnnd innwoner vnßer fursten-